

## lis Gnovis

■ **DARTIGNE.** Cent agns di culture

«Chè dai 2 di Dicembar e je une zornade di fieste ancje par noaltris dal Cirf. Cun di fat, juste in chè di al finis cent agns il professôr Nereo Perini, che al à fat pardabon cetant inte sò vite pe culture, pe istruzion e pe lenghe de sò int e pe Università dal Friùl... ancje il «Centri Interdipartimentâl pal Svilup de Lenghe e de Culture dal Friùl» al à fat fieste pal cjadalan di Nereo Perini, lustrissim espert di Didatiche des lenghis modernis, natif di Dartigne. Il diretôr, Enrico Peterlunger, intune note uficiâl, al à marcât il grant servizi dal professôr centenari, començât tes scuclis mezanis e superiôrs di Udin (al à stât ancje dean dal istitût «Zanon») e lâit indevant tes Universitâts di Triest e dal Friùl. Come diretôr dal Istitût di Pedagogjie e di Didatiche des Lenghis modernis, Perini al à inviât il Centri linguistic audiovisifs e il Centri interdipartimentâl di ricercje didatiche, colaborant ancje te creazion dal Centri internazionâl sul Plurilinguism. «Il so grup di lavôr, dilunc vie dai agns Otante e Nonante dal secul stât – al à motivât Peterlunger –, al à metût adun cetancj progjets pilote di educazion bilengâl furlan-talian e sloven-talian tes scuclis de infanzie de Provincie di Udin, e ancjencj materiâi didatics».

■ **TURIN.** Messe di Nadâl

I furlans di Turin, clamâts adun dal so «Fogolâr», domenie ai 19 di Dicembar, si dan dongje li de abitance di Corso Francia 275b, par continuâ la lungje tradizion de liturgjie eucaristiche di Nadâl. Al cjantarà messe par furlan, a 10 di buinore, pre' Ermis Segatti. Par informazions: 011 7723021 / info@fogolartorino.it.

■ **CORMONS.** Un tesaur di biodiversitât

Fra lis razis rivadis te zone di Bosc Disot, i naturaliscj di Cormons a àn ricognossût, te Vierte stade, ancje la «Netta rufina» (par talian, «Fistione turco»), ch'è je une cualitât «vulnerabil», seont la «Lista rossa degli uccelli nidificanti in Italia». La gnove e va acetade cun grande sodisfazion – e à marcât «Legambiente» – e come una raccomandazion a lâ indevant tal program di protezion e di valorizazion de viere gjave tornade a naturalizâ. Di chest an, il comprensori al è calculât «Aree di rilevanza erpetologjiche statâl», pes svariadis popolazions di sarpints e di anfibis. E 33 a son lis cualitâts di uciei contâts tal sît, ch'al è proprietât private. I parons, parie cul Cumon di Cormons, a àn bielzà palesât l'intindiment d'inmanea une Riserve naturâl regionâl, sul stamp di chè de fôs dal Lisuç, e «Legambiente» e propon ch'al sedi inmanea ancje un «Biotopo naturale», daûr de leç regionâl 42/1996.

■ **SPIILIMBERC.** Zâl par furlan

Par cure dal Cumon di Spilimberc, al tone il concurs leterari «Zâl par furlan». Si podarà concori cun contis o cun videos di gjenar «zâl». Une sezion speciâl e je dedicade a lis scuclis secundariis di prin e di secont grât. Il regolament dal premi e i modui par notâsi a son sometûts dal lûc internet: [www.comune.spilimbergo.pn.it/it/zal-par-furlan-9a-edizione-62114](http://www.comune.spilimbergo.pn.it/it/zal-par-furlan-9a-edizione-62114). Lis oparis pal concurs, ch'al è prudelât de Societât filologjiche, di «ARLeF», dal Istitût «Pre' Checo Placerean» e de Union dai scritôrs furlans, a varan di jessi consegnadis drenti dai 28 di Fevrâr dal 2022.

**Mercus 15** S. Virgjinie Bracelli

**Joibe 16** S. Delaide imperadore

**Vinars 17** S. Lazar vescul

**Sabide 18** S. Grazian vescul

**Domenie 19** IV Domenie di Avent

**Lunis 20** S. Liberal martar

**Martars 21** S. Pieri Canisio

**Il timp** Zornadis fredis.



**Il soreli**  
Ai 15 al jeve aes 7.43  
e al va a mont aes 16.22.



**La lune**  
Ai 19 Lune plene.

**I proverbi**  
Di Sante Luzie a Nadâl si slungje un pit di gjâl;  
di Sante Luzie a Sante Catarine un pit di gjaline.  
**Lis voris dal mès**  
Atenzion a no cjaminâ su la jerbe dal prât  
cuant che e je glaçade par no ruvinâle.

## La Scuele de Vicinîe

*Par imparâ a condusi,  
in autonomie,  
i Bens coletîfs*

**U**ne lezion dal economist trentin Geremia Gios su «La gjestion dai Bens coletîfs un speli par Comunitâts sostenibils» e à screât, ai 10 di Dicembar, l'an gnûf de «Scuele da lis Proprietâts coletivis».

Il program formatif, imbastît dal innomenât «Centro studi e documentazione sui Demanis civici e le Proprietà collettive» di Trent, al proponarà in dut sis lezions, une par mès, fintremai tal mès di Mai dal 2022.

In grazie de disponibilitât de Università di Trent, dulà che il Centri organizadôr al è nassût e là ch'al opere saldo, associant i plui grancj esperts talians di Assets fondiariis coletîfs, lis lezions a saran dutis «on line» (su la plateforme «Zoom» di «UniTrento») e a saran trasmetudis, in direte, ancje sul cjanâl universitari «Uscivici» ([www.youtube.com/channel/UCI\\_UID1B-jjEV3mfnP-2DIVQ](http://www.youtube.com/channel/UCI_UID1B-jjEV3mfnP-2DIVQ)).

Il professôr Pietro Nervi, ch'al à fondât e ch'al guide il Centri studi sui Demanis civici, al à batîât la scuele «Cattedra delle Proprietà collettive», rinvocant la storiche esperience des «Cattedre ambulanti di agricoltura» che, vie pal Nûfcent, a son stadis «la plui impuante istituzion pe istruzion agrarie, destinade in specialità ai piçûl contadins», cemût ch'è marche l'enciclopedia internazionâl «Wikipedia». I prins scuclars de «Scuele da lis Proprietâts coletivis» a son, sore il dut, chei Consuarts e Vicins ch'è ministrin lis Vicinîis dal di di vuê, al ven a stâi Consuarts e Amministrazioni dai Bens frazionai e civici de Furlanîe, «Agrarmenschaft / Nachbarschaft» de Val Cjanâl/Kanaltal, Jus e Srenje de Slavanie, o



La benedizion dai prodots des Tieris coletivis de Patrie, a Muçane, intant de Fieste dai Bens comuns dal 2016

**Il Centri studi sui Demanis civici di Trent al propon sis lezions «on line»**

ben, te denominazion unitarie screade de leç statâl 168 dal 2017, i gnûfs «Dominis coletîfs».

Propit su la storiche riforme dal 2017 e fassarà riflès la seconde lezion dal cors, stabilide par vinars ai 14 di Zenâr. Come chei altris apontaments, e colarà di 17 a 19.30 di sere.

Il program de Scuele al larà indevant profundint lis cuistions da «La Proprietà collettive tal Catastic e tal Libri fondiari» (ai 11 di Fevrâr) e da «L'amministrazione tra ats sojetîfs, ogjetîfs, vincolâts e discrezionai» (ai 11 di Març).

La lezion dal mès di Avrîl e sarà dedicade al rapuart fra «Bens coletîfs e turisim» e l'ultim apontament dal

an al frontarà une da lis cuistions che, tal fra timp, i scuclars a varan proponût e sierzût. Par chel, il Centri studi trentin sui Demanis civici al invide ducj i siei interlocutors a segnalâ problematichis di profundî par rindi la «Scuele da lis Proprietâts coletivis» simpri plui viva-rose e interessante (doprant lis direzions di pueste eletroniche: [geremia.gios@unitn.it](mailto:geremia.gios@unitn.it) e [uscivici@unitn.it](mailto:uscivici@unitn.it)).

A la «Cattedra delle Proprietà collettive» e je riservade ancje une pagjine web, che si cgate a la direzion: <https://sites.google.com/unitn.it/proprietacollettive/cattedra/incontri>.

**Mario Zili**

## L'aplicazion de leç 168/2017

Tal lûc internet [www.friul.net/vicinia.php](http://www.friul.net/vicinia.php), di cualchi setemane, si pues lei un articol gnûf dal espert di politicis pal svilup economic e social dai teritoris montans, Maurizio Daici, ch'al resone su «L'applicazione della legge 168/2017 nel Friuli Venezia Giulia». Par Daici, «e je clare la bisugne di meti man in cheste materie, al mancûl par regolamentâ l'ativitât amministrative delegade de leç statâl 168/2017 a lis Regjons» e par dâi seont al superament de leç regionâl 3/1996.

## Messe in marilenghe

A Udin, la Messe par furlan e ven cjantade ogni sabide a 5 e mieze soresere (17.30), li de capele de «Puritât», daprûf dal domo. Sabide ai 18 di Dicembar al cjantarà Messe pre D. Volpe. Radio Spazio e trasmet sul moment, ogni setemane, dute la liturgjie.

## La ARLeF e rive su TikTok cun "Tic e Tac Furlan"

**S**i clame "Tic e Tac Furlan" e al è il gnûf canâl TikTok de ARLeF. «Une bieles novitât, che i crodin tant – al à fat savê il president de Agenzie Regionâl pe Lenghe Furlane, Eros Cisilino –. La ativitât de Agenzie e je une avonde svariade e l'impegn par lavorâ simpri daûr cui timps al è costant, cence calculâ, cemût che al è declarât une vore tal "Plan gjenarâl di politiche linguistiche pe lenghe furlane 2021-25", la atenzion dreçade a zovinis e gnovis tecnologijis. Par chest la siele di rivâ intun dai social che in di di vuê al è tra i plui populârs fra i adolents e je stade une evoluzion naturâl. Il nestri impegn a dialogâ cu lis gnovis gjenerazions al è costant e la direzion e somee che e sedi propit ch'è juste», se si calcole che in pòc plui di doi mès de viertidure dal gnûf

canâl si regjistrin za plui di 4500 followers, cuasi 40 mil likes e 900 mil visualizazions. La interprete di cheste gnove iniziative - che e smire a dâ nozions di marilenghe midiant di videos curts e divertents di massim 3 minûts - e je Greta Fabbro, une insegnante te scuele de infanzie originarie di San Vit di Feagne, che e à sfrancjât lis sôs competencis partecipant al cors dal Ires "Tecnichis di promozion linguistiche e culturâl furlane", promovût de Agenzie Regionâl pe Lenghe Furlane e dreçât a dâ i struments di marketing e di comunicazion che a coventin par promovi e par valorizâ il patrimoni linguistic. Il so sens fuart dal umorisim, la passion pai travistiments, dutune cu la assistente pelose e "cjarone" de gjate brasiliane Preta, a parin jessi une misture di sucès.



Greta Fabbro e Preta

Lis lôr clips a son daûr a appassionâ in maniere particulâr i followers che a àn dât acet ae gnove propueste cun tancj messaçs di benivgnût e tancj invits a lâ indenant in cheste esperience che e je sedi istrutive che divertente. Sul canâl si cjamin i temis plui svariâts cuntune serie di rubrichis tant che "Peraulis", che e ponte a fâ capi cuâi che a son i tiermins "infurlanâts" e cualis che a son lis peraulis furlanis coretis; "Sbrissadis", par segnalâ lis interferencis plui comunis de marilenghe cul talian; "FurlanLenghe" par sclari che cognossi il furlan al jude l'aprendiment di chês altris lenghis.